



REPUBLIKA E SHQIPËRISË

KUVENDI

**PROJEKTLIGJ**

Nr. \_\_\_\_/2019

**PËR DISA SHTESA DHE NDRYSHIME NË LIGJIN NR. 115/2016 “PËR ORGANET E QEVERISJES SË SISTEMIT TË DREJTËSISË”**

Në mbështetje të neneve 81, pika 2, dhe 83, pika 1, të Kushtetutës, me propozimin e një grupi deputetësh,

K U V E N D I

I REPUBLIKËS SË SHQIPËRISË

V E N D O S I:

Në ligjin nr. 115/2016 “Për organet e qeverisjes së sistemit të drejtësisë”, bëhen shtesat dhe ndryshimet e mëposhtme:

**Neni 1**

Neni 5 ndryshohet si më poshtë:

“Neni 5

**Shkeljet disiplinore të anëtarëve të Këshillit të Lartë Gjyqësor**

1. Anëtari i Këshillit të Lartë Gjyqësor kryen shkelje disiplinore, me dashje ose për shkak të pakujdesisë, kur:

- a) kryen veprime ose mosveprime, të cilat përbëjnë mospërbushjen e detyrës, sillen joprofessionalisht ose jo në mënyrë etike gjatë ushtrimit të funksionit ose jashtë zyrës dhe me këtë diskrediton ose dëmton besimin e publikut në sistemin gjyqësor, pozitën dhe figurën e anëtarit të Këshillit të Lartë Gjyqësor;
- b) gjatë ushtrimit të funksionit, nuk i referohet ligjit ose fakteve për shkak të pakujdesisë së rëndë ose me dashje, ose kur ka paaftësi të dukshme profesionale.

2. Kur përcaktohet nëse veprimi, mosveprimi ose sjellja e anëtarit të Këshillit të Lartë Gjyqësor konsiderohet shkelje disiplinore për shkak të pakujdesisë ose si një çështje e veprimtarisë profesionale, në çdo rast duhet të merren parasysh treguesit e mëposhtëm:

- a) shkalla e pakujdesisë;
- b) shpeshtësia e veprimit ose mosveprimit;
- c) dëmtimi ose mundësia e shkakimit të dëmtimit ose shkalla e pasojave që kanë ardhur ose mund të vijnë nga veprimi ose mosveprimi; si dhe
- ç) çdo situatë që është përtej kontrollit të anëtarit të Këshillit të Lartë Gjyqësor dhe që mund të lidhet me mosfunksionimin e sistemit gjyqësor.

## Neni 2

Pas nenit 5 shtohen nenet 5/1, 5/2 dhe 5/3 me këtë përmbajtje:

### “Neni 5/1

#### **Shkeljet disiplinore në lidhje me ushtrimin e funksionit**

1. Shkeljet disiplinore gjatë ushtrimit të funksionit janë në veçanti, por nuk kufizohen vetëm në veprimet, mosveprimet ose sjelljet e anëtarit të Këshillit të Lartë Gjyqësor, si më poshtë:

- a) mosparaqitja e kërkesës për përjashtim, kur është e detyrueshme, sipas ligjit, nëse anëtari i Këshillit të Lartë Gjyqësor ka dijeni ose duhet të kishte dijeni për rrethana të tilla;
- b) paraqitja e kërkesës për heqje dorë të anëtarit të Këshillit të Lartë Gjyqësor nëse ky veprim:
  - i) nuk bazohet në shkaqe të parashikuara në ligj;
  - ii) bëhet me qëllim që të krijohen përfitime të padrejta për subjektin e procedimit ose synon shmangien e përgjegjësisë ligjore nga anëtari i Këshillit të Lartë Gjyqësor ose që çështja t'i caktohet një anëtari tjetër të Këshillit të Lartë Gjyqësor;
  - iii) nuk paraqitet menjëherë pasi njoftohet për shkakun;
- c) ndërhyrja ose ndikimi i padrejtë në ushtrimin e funksionit të një anëtari tjetër të Këshillit të Lartë Gjyqësor;
- ç) përsëritje ose mospërbushje e funksioneve pa shkak të ligjshëm;
- d) vonesa të përsëritura ose që sjellin pasoja të rënda, ose zvarritje të veprimeve procedurale dhe/ose të akteve procedurale pa shkak të ligjshëm;
- dh) veprimi, mosveprimi ose sjellja e anëtarit të Këshillit të Lartë Gjyqësor, i cili krijon përfitime të padrejta ose dëmtim të subjektit të procedimit;
- e) angazhimi i personave të jashtëm në kryerjen e detyrave që me ligj i takojnë anëtarit, ose delegimi i detyrave apo veprimtarive që lidhen me ushtrimin e funksionit të anëtarit të Këshillit të Lartë Gjyqësor;
- ë) mungesë e pajustificuar në detyrë, sipas parashikimeve të këtij ligji;
- f) shkelje e rëndë ose e përsëritur e dispozitave ligjore dhe nënligjore që rregullojnë organizimin dhe funksionimin e Këshillit të Lartë Gjyqësor dhe që lidhen me kryerjen e funksioneve të anëtarit të këtij Këshilli;
- g) mospërbushja e detyrimit për të marrë pjesë në programet e trajnimit të vazhdueshëm, sipas kushteve dhe kritereve të përcaktuara në legjislacionin në fuqi për statusin e gjyqtarëve dhe prokurorëve, pa shkaqe të justifikuara;
- gj) mosnjohimi i Kryetarit të Këshillit, si dhe autoriteteve kompetente sipas ligjit mbi ndërhyrjet ose forma të tjera të ndikimit nga magistratët, avokatët, funksionarë politikë, zyrtarët publikë ose subjekte të tjera;
- h) shkelje e rregullave të konfidencialitetit, të parashikuara nga legjislacioni në fuqi, për të cilat merr dijeni për shkak të funksionit si anëtar i Këshillit të Lartë Gjyqësor;

- i) pengimi i Këshillit, Inspektorit të Lartë të Drejtësisë, apo ndonjë organi tjetër publik në kryerjen e funksioneve të tij, sipas ligjit;
- j) shkelje e detyrimit të konfidencialitetit dhe moszbulimit të informacionit që rezulton nga ushtrimi i funksioneve të tij si anëtar i Këshillit;
- k) mosnjohim i Këshillit për arsytet që përbëjnë rastin e ndërprerjes së mandatit të anëtarit të Këshillit të Lartë Gjyqësor;
- l) mosrespektimi i detyrimeve ligjore, duke përfshirë rregullat në lidhje me deklarimin e pasurisë dhe konfliktin e interesit, sipas ligjit.

#### Neni 5/2

#### **Shkelje disiplinore jashtë ushtrimit të funksionit**

Shkeljet disiplinore jashtë ushtrimit të funksionit janë në veçanti, por nuk kufizohen vetëm në veprimet, mosveprimet dhe sjelljet e anëtarit të Këshillit të Lartë Gjyqësor, si vijon:

- a) shkelja e rregullave të papajtueshmërisë me funksionin e magistratit, ose të kufizimeve për shkak të detyrës, sipas parashikimeve të neneve 6 dhe 7 të legjislacionit në fuqi për statusin e gjyqtarëve dhe prokurorëve;
- b) përdorimi i pozicionit të anëtarit të Këshillit për krijimin e përfitimeve të pajustificuara për veten ose për të tjerët;
- c) pranimi dhe ushtrimi i detyrave dhe veprimtarive jashtë funksionit, pa marrë miratimin paraprak të parashikuar për këtë qëllim, sipas ligjit;
- ç) shoqërimi me persona që janë nën ndjekje penale ose janë subjekt i procedimeve penale ose me persona të dënuar dhe të parehabilituar, kur nuk kanë lidhje të ngushta gjaku ose krushqie me anëtarin e Këshillit ose vendosja e marrëdhënieve të papërshtatshme të biznesit me këta persona;
- d) përfitimi i drejtpërdrejtë ose i tërthortë i dhuratave, favoreve, premtimeve ose trajtimit preferencial të çfarëdo lloji, të cilat jepen për shkak të funksionit të ushtruar ose për shkak të përdorimit të pozitës si anëtar i Këshillit edhe në rastin kur formalizohen me një veprim juridik;
- dh) raste të tjera të sjelljes që diskreditojnë pozitën dhe figurën e anëtarit dhe dëmton besimin e publikut në sistemin gjyqësor, të kryera jashtë ushtrimit të detyrës.

#### Neni 5/3

#### **Shkelje disiplinore për shkak të kryerjes së një vepre penale**

1. Shkeljet disiplinore për shkak të kryerjes së një vepre penale janë veprime, mosveprime ose sjellje, në bazë të fakteve të pranura nga organi kompetent në vendimin e formës së prerë, për të cilat anëtarin e Këshillit të Lartë Gjyqësor është dënuar për kryerjen e një vepre penale, të cilat, sipas natyrës së tyre, diskreditojnë pozitën dhe figurën e anëtarit të Këshillit të Lartë Gjyqësor ose dëmtojnë rëndë besimin e publikut në sistemin gjyqësor.
2. Shkeljet disiplinore janë gjithashtu veprime, mosveprime ose sjellje të bazuara në faktet e pranura nga organi kompetent me vendim të formës së prerë, të cilat, sipas natyrës së tyre, diskreditojnë pozicionin dhe figurën e anëtarit të Këshillit të Lartë Gjyqësor ose dëmtojnë rëndë besimin e publikut në sistemin gjyqësor, që përbëjnë vepër penale, pavarësisht se vepra penale është shuar, ndjekja penale nuk mund të fillojë ose nuk mund të vazhdojë, ose anëtarin e Këshillit të Lartë Gjyqësor është rehabilituar, ose ka përfituar nga falja dhe amnistia.
3. Në rastet e parashikuara në pikat 1 dhe 2, të këtij neni, masa disiplinore e shkarkimit nga detyra mund të jepet vetëm nëse dënimi me vendim të formës së prerë është dhënë për kryerjen e një krimi.”.

### Neni 3

Neni 61 ndryshohet si më poshtë:

“Neni 61

#### **Mbledhja plenare e Këshillit të Lartë Gjyqësor**

1. Këshilli i Lartë Gjyqësor organizohet dhe e ushtron veprimtarinë e tij në komisione ose në mbledhje plenare.
2. Mbledhja plenare e Këshillit të Lartë Gjyqësor ushtron kompetencat e mëposhtme:
  - a) emëron, vlerëson, ngre në detyrë dhe transferon gjyqtarët e të gjitha niveleve;
  - b) vendos masa disiplinore kundër gjyqtarëve të të gjitha niveleve;
  - c) i propozon Presidentit të Republikës kandidatët për gjyqtarë në Gjykatën e Lartë, në përputhje me ligjin;
  - ç) miraton rregullat e etikës gjyqësore dhe mbikëqyr zbatimin e tyre;
  - d) menaxhon dhe kujdeset për veprimtarinë në administratën e gjykatave, përveç veprimtarisë së strukturave të teknologjisë së informacionit në gjykata, e cila rregullohet me vendim të Këshillit të Ministrave;
  - dh) propozon dhe administron buxhetin e tij dhe atë të gjykatave;
  - e) informon publikun dhe Kuvendin për situatën e sistemit gjyqësor;
  - ë) miraton aktet nënligjore normative, në zbatim të këtij ligji ose të ligjeve të tjera, me ndikim të përgjithshëm detyrues për të gjithë gjyqtarët, administratën gjyqësore, personat privatë dhe organet publike;
  - f) miraton aktet për rregullimin e procedurave të brendshme të Këshillit;
  - g) shqyrton ankesat kundër vendimeve të komisioneve;
  - gj) miraton udhëzimet e përgjithshme jodetyruese;
  - h) miraton rregullat e hollësishme për funksionimin e administratës së Këshillit;
  - i) miraton përbërjen e komisioneve të përhershme, të komisioneve të përkohshme, si dhe rregulla të detajuara për veprimtarinë e tyre.
3. Në mbledhjen plenare marrin pjesë të gjithë anëtarët e Këshillit. Anëtari i Këshillit nuk merr pjesë në vendimmarrjen e mbledhjes plenare ose komisionit për çështje të mëposhtme të rendit të ditës:
  - a) në rast vendimi për çështje disiplinore, kur anëtari ka paraqitur tek Inspektori i Lartë i Drejtësisë kërkesën, mbi bazën e së cilës ka nisur procedimi disiplinor;
  - b) nëse si anëtar i komisionit ka marrë vendim për një çështje disiplinore, të parashikuar në pikën 13, të nenit 62, të këtij ligji.
4. Komisionet kryejnë veprimtari të tjera në përputhje me rregulloren e brendshme.

### Neni 4

Pika 2, e nenit 76, ndryshohet si më poshtë:

“2. Vendimi për përjashtimin e një anëtari nga shqyrtimi i një çështjeje në komision ose seancë plenare merret nga Këshilli, sipas rregullave të parashikuara në nenin 72 të këtij ligji. Kur kërkohet përjashtimi i Kryetarit të Këshillit, mbledhja kryesohet nga Zëvendëskryetari i Këshillit.”.

### Neni 5

Neni 103 ndryshohet si më poshtë:

“Neni 103

### **Shkeljet disiplinore të anëtarëve të Këshillit të Lartë të Prokurorisë**

1. Anëtari i Këshillit të Lartë të Prokurorisë kryen shkelje disiplinore, me dashje ose për shkak të pakujdesisë, kur:

a) kryen veprime ose mosveprime, të cilat përbëjnë mospërbushjen e detyrës, sillet joprofessionalisht ose jo në mënyrë etike gjatë ushtrimit të funksionit ose jashtë zyrës dhe me këtë diskrediton ose dëmton besimin e publikut në sistemin gjyqësor, pozitën dhe figurën e anëtarit të Këshillit të Lartë të Prokurorisë;

b) gjatë ushtrimit të funksionit, nuk i referohet ligjit ose fakteve për shkak të pakujdesisë së rëndë ose me dashje, ose kur ka paafësi të dukshme profesionale.

2. Kur përcaktohet nëse veprimi, mosveprimi ose sjellja e anëtarit të Këshillit të Lartë të Prokurorisë konsiderohet shkelje disiplinore për shkak të pakujdesisë ose si një çështje e veprimtarisë profesionale, në çdo rast duhet të merren parasysh treguesit e mëposhtëm:

a) shkalla e pakujdesisë;

b) shpeshtësia e veprimit ose mosveprimit;

c) dëmtimi ose mundësia e shkaktimit të dëmtimit ose shkalla e pasojave që kanë ardhur ose mund të vijnë nga veprimi ose mosveprimi; si dhe

ç) çdo situatë që është përtej kontrollit të anëtarit të Këshillit të Lartë të Prokurorisë dhe që mund të lidhet me mosfunksionimin e sistemit gjyqësor.”.

### **Neni 6**

Pas nenit 103 shtohen nenet 103/1, 103/2 dhe 103/3 me këtë përmbajtje:

Neni 103/1

### **Shkeljet disiplinore në lidhje me ushtrimin e funksionit**

1. Shkeljet disiplinore gjatë ushtrimit të funksionit janë në veçanti, por nuk kufizohen vetëm në veprimet, mosveprimet ose sjelljet e anëtarit të Këshillit të Lartë të Prokurorisë, si më poshtë:

a) mosparaqitja e kërkesës për përjashtim, kur është e detyrueshme, sipas ligjit, nëse anëtari i Këshillit të Lartë të Prokurorisë ka dijeni ose duhet të kishte dijeni për rrethana të tilla;

b) paraqitja e kërkesës për heqje dorë të anëtarit të Këshillit të Lartë të Prokurorisë nëse ky veprim:

i) nuk bazohet në shkaqe të parashikuara në ligj;

ii) bëhet me qëllim që të krijohen përfitime të padrejta për subjektin e procedimit ose synon shmangien e përgjegjësisë ligjore nga anëtari i Këshillit të Lartë të Prokurorisë ose që çështja t'i caktohet një anëtari tjetër të Këshillit të Lartë të Prokurorisë;

iii) nuk paraqitet menjëherë pasi njoftohet për shkakun;

c) ndërhyrja ose ndikimi i padrejtë në ushtrimin e funksionit të një anëtari tjetër të Këshillit të Lartë të Prokurorisë;

ç) përsëritje ose mospërbushje e funksioneve pa shkak të ligjshëm;

d) vonesa të përsëritura ose që sjellin pasoja të rënda ose zvarritje të veprimeve procedurale dhe/ose të akteve procedurale pa shkak të ligjshëm;

- dh) veprimi, mosveprimi ose sjellja e anëtarit të Këshillit të Lartë të Prokurorisë, i cili krijon përfitime të padrejta ose dëmton të subjektit të procedimit;
- e) angazhimi i personave të jashtëm në kryerjen e detyrave që me ligj i takojnë anëtarit, ose delegimi i detyrave apo veprimtarive që lidhen me ushtrimin e funksionit të anëtarit të Këshillit të Lartë të Prokurorisë;
- ë) mungesë e pajustificuar në detyrë, sipas parashikimeve të këtij ligji;
- f) shkelje e rëndë ose e përsëritur e dispozitave ligjore dhe nënligjore që rregullojnë organizimin dhe funksionimin e Këshillit të Lartë të Prokurorisë dhe që lidhen me kryerjen e funksioneve të anëtarit të këtij Këshilli;
- g) mospërbushja e detyrimit për të marrë pjesë në programet e trajnimit të vazhdueshëm, sipas kushteve dhe kritereve të përcaktuara në legjislacionin në fuqi për statusin e gjyqtarëve dhe prokurorëve, pa shkaqe të justifikuara;
- gj) mosnjohimi i Kryetarit të Këshillit, si dhe autoriteteve kompetente, sipas ligjit, mbi ndërhyrjet ose forma të tjera të ndikimit nga magjistratët, avokatët, funksionarë politikë, zyrtarët publikë ose subjekte të tjera;
- h) shkelje e rregullave të konfidencialitetit, të parashikuara nga legjislacioni në fuqi, për të cilat merr dijeni për shkak të funksionit si anëtar i Këshillit të Lartë të Prokurorisë;
- i) pengimi i Këshillit, Inspektorit të Lartë të Drejtësisë, apo ndonjë organi tjetër publik në kryerjen e funksioneve të tij, sipas ligjit;
- j) shkelje e detyrimit të konfidencialitetit dhe moszbulimit të informacionit që rezulton nga ushtrimi i funksioneve të tij si anëtar i Këshillit;
- k) mosnjohim i Këshillit për arsyet që përbëjnë rastin e ndërprerjes së mandatit të anëtarit të Këshillit të Lartë të Prokurorisë;
- l) mosrespektimi i detyrimeve ligjore, duke përfshirë rregullat në lidhje me deklarin e pasurisë dhe konfliktin e interesit, sipas ligjit.

#### Neni 103/2

#### **Shkelje disiplinore jashtë ushtrimit të funksionit**

Shkeljet disiplinore jashtë ushtrimit të funksionit janë në veçanti, por nuk kufizohen vetëm në veprimet, mosveprimet dhe sjelljet e anëtarit të Këshillit të Lartë të Prokurorisë, si vijon:

- a) shkelja e rregullave të papajtueshmërisë me funksionin e magjistratit, ose të kufizimeve për shkak të detyrës, sipas parashikimeve të neneve 6 dhe 7 të legjislacionit në fuqi për statusin e gjyqtarëve dhe prokurorëve;
- b) përdorimi i pozicionit të anëtarit të Këshillit për krijimin e përfitimeve të pajustificuara për veten ose për të tjerët;
- c) pranimi dhe ushtrimi i detyrave dhe veprimtarive jashtë funksionit, pa marrë miratimin paraprak të parashikuar për këtë qëllim, sipas ligjit;
- ç) shoqërimi me persona që janë nën ndjekje penale ose janë subjekt i procedimeve penale ose me persona të dënuar dhe të parehabilituar, kur nuk kanë lidhje të ngushta gjaku ose krushqie me anëtarin e Këshillit ose vendosja e marrëdhënieve të papërshtatshme të biznesit me këta persona;
- d) përfitimi i drejtpërdrejtë ose i tërthortë i dhuratave, favoreve, premtimeve ose trajtimit preferencial të çfarëdo lloji, të cilat jepen për shkak të funksionit të ushtruar ose për shkak të përdorimit të pozitës si anëtar i Këshillit edhe në rastin kur formalizohen me një veprim juridik;
- dh) raste të tjera të sjelljes që diskreton pozitën dhe figurën e anëtarit dhe dëmton besimin e publikut në sistemin e prokurorisë, të kryera jashtë ushtrimit të detyrës.

#### Neni 103/3

#### **Shkelje disiplinore për të shkak të kryerjes së një vepre penale**

1. Shkeljet disiplinore për shkak të kryerjes së një vepre penale janë veprime, mosveprime ose sjellje, në bazë të fakteve të pranuar nga organi kompetent në vendimin e formës së presë, për të cilat anëtari i Këshillit të Lartë të Prokurorisë është dënuar për kryerjen e një vepre penale, të cilat, sipas natyrës së tyre, diskreditojnë pozitën dhe figurën e anëtarit të Këshillit të Lartë të Prokurorisë ose dëmtojnë rëndë besimin e publikut në sistemin e prokurorisë.
2. Shkeljet disiplinore janë gjithashtu veprime, mosveprime ose sjellje të bazuara në faktet e pranuar nga organi kompetent me vendim të formës së prerë, të cilat, sipas natyrës së tyre, diskreditojnë pozicionin dhe figurën e anëtarit të Këshillit të Lartë të Prokurorisë ose dëmtojnë rëndë besimin e publikut në sistemin gjyqësor, që përbëjnë vepër penale, pavarësisht se vepra penale është shuar, ndjekja penale nuk mund të fillojë ose nuk mund të vazhdojë, ose anëtari i Këshillit të Lartë të Prokurorisë është rehabilituar, ose ka përfituar nga falja dhe amnistia.
3. Në rastet e parashikuara në pikat 1 dhe 2, të këtij neni, masa disiplinore e shkarkimit nga detyra mund të jepet vetëm nëse dënimi me vendim të formës së prerë është dhënë për kryerjen e një krimi.”.

## Neni 7

Neni 159 ndryshohet si më poshtë:

“Neni 159

### **Mbledhja plenare e Këshillit të Lartë të Prokurorisë**

1. Këshilli i Lartë i Prokurorisë organizohet dhe e ushtron veprimtarinë e tij në komisione ose në mbledhje plenare.
2. Mbledhja Plenare e Këshillit të Lartë të Prokurorisë ushtron kompetencat e mëposhtme:
  - a) emëron, vlerëson, ngre në detyrë dhe transferon prokurorët e të gjitha niveleve;
  - b) vendos masa disiplinore ndaj prokurorëve të të gjitha niveleve;
  - c) i propozon Kuvendit kandidatët për Prokuror të Përgjithshëm;
  - ç) miraton rregullat për etikën e prokurorëve dhe mbikëqyr respektimin e tyre;
  - d) propozon dhe administron buxhetin e tij;
  - dh) informon publikun dhe Kuvendin mbi gjendjen e prokurorisë;
  - e) miraton aktet nënligjore normative, në zbatim të këtij ligji ose të ligjeve të tjera, me ndikim të përgjithshëm detyruës për të gjithë prokurorët;
  - ë) miraton aktet për rregullimin e procedurave të brendshme të Këshillit;
  - f) shqyrton ankesat kundër vendimeve të komisioneve;
  - g) miraton udhëzimet e përgjithshme jodetyruese;
  - gj) miraton rregullat e hollësishme për funksionimin e administratës së Këshillit;
  - h) miraton përbërjen e komisioneve të përhershme, të komisioneve të përkohshme, si dhe rregulla të detajuara për veprimtarinë e tyre.
3. Në mbledhjen plenare marrin pjesë të gjithë anëtarët e Këshillit. Një anëtar i Këshillit nuk merr pjesë në vendimmarrjen e mbledhjes plenare ose Komisionit për çështje të mëposhtme të rendit të ditës:

- a) në rast vendimi për çështje disiplinore, kur anëtari ka paraqitur tek Inspektori i Lartë i Drejtësisë kërkesën, mbi bazën e së cilës ka nisur procedimi disiplinor;
- b) nëse si anëtar i komisionit ka marrë vendim për një çështje disiplinore, të parashikuar në pikën 13, të nenit 160, të këtij ligji.
4. Komisionet kryejnë veprimtari të tjera në përputhje me rregulloren e brendshme.”.

### **Neni 8**

Pika 2, e nenit 175, ndryshohet si më poshtë:

“2. Vendimi për përjashtimin e një anëtari nga shqyrtimi i një çështjeje në komision ose seancë plenare merret nga Këshilli, sipas rregullave të parashikuara në nenin 171 të këtij ligji. Kur kërkohet përjashtimi i Kryetarit të Këshillit, mbledhja kryesohet nga Zëvendëskryetari i Këshillit.”.

### **Neni 9**

#### **Hyrja në fuqi**


Ky ligj hyn në fuqi 15 ditë pas botimit në Fletoren Zyrtare.

**K R Y E T A R I**

**Gramoz RUÇI**

Miratuar në datën \_\_\_\_\_ 2019





REPUBLIKA E SHQIPËRISË  
KUVENDI

Tiranë, më \_\_\_\_\_ 2019

Dënda : Propozim nismë ligjore të projektligjit “Për disa shtesa dhe ndryshime në ligjin nr. 115/2016 “Për organet e qeverisjes në sistemin e drejtësisë”

Drejtuar : Z. Gramoz RUÇI  
KRYETAR I KUVENDIT TË SHQIPËRISË

K ë t u

I nderuar zoti Kryetar i Kuvendit,

Bazuar në nenin 81, pika 1 të Kushtetutës dhe të neneve 87 e 68 të Rregullores së Kuvendit, një grup deputetësh, anëtarë të Këshillit për Legjislacionin, në zbatim të vendimit nr.14, datë 03.06.2009, dhe vendimit nr.78, datw 12.12.2017, të Gjykatës Kushtetuese, depoziton për shqyrtim dhe miratim në Kuvend nismën ligjore “Për disa shtesa dhe ndryshime në ligjin nr. 115/2016 “Për organet e qeverisjes në sistemin e drejtësisë”

Bashkëlidhur janë teksti i nismës ligjore dhe relacioni shoqërues i tij.

Bashkim FINO

Kryesues i radhës i Këshillit për Legjislacionin